

Naqqiut

Nassiussamut siullermut 23. septembari 2016-imeersumut taartaasoq
 (“*Saqqummiussinermut allakkiaq*” taarserneqarpoq “*Akissuteqaat*”)

Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UKA 17-mut saqqummiunneqartussamik periusissiamik suliaqarnissaminut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortat Kalistat Lund aamma Múte Bourup Egede, Inuit Ataqatigiit)

Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerinnineq

Qujanaq siunnersuutissinnut Naalakkersuisut isumaqatigilluinnagaannut. Soorunami nunarput nammineq aqussavarput, sulissutigiuannarlugulu nunatsinni pisuussutsitta nutartsertuarnissaat, aamma innuttaasut piginnaanngorsartuaannarnissaat, namminii-leriartornerup aqutaani.

Allappusi inuit maani pisortani suliartortartut sivikitsuinnarmik maaniittartut, kisianni misissuineq suliareqqammigarput qujanartumik takutitsivoq pisortat allaffissornikkut ingerlatsiviini danskit nunanilu allamiut allat sulisuusartut ukiuni kingullerni ikileriarsimasut, aammalu suli amerlaneruleralluttuinnartut nunatsinni inunngorsimasut pisortani suliffissani sivisunerusumik ilinniarsimanissamik piumasaqarfiusuni suliffeqalertartut.

Tassalu siumut ingerlavugut. Tamanna pillugu annertunerusumik atuarneqarsinnaavoq nassuiaasiaq ”Nunanit allamiunut suliassaqarfik killeqarfinnillu nakkutilliineq”, maanna ilaasortanut agguanneqaqqammersoq, aammalu immikkoortoqartoq pisortani danskit sulisuusut pillugit.

2015-imi saqqummiupparput Suliffissaqartitsinermi periusissiaq ”Suliffeqarneq toqqissisimanartoq”. Taanna suliniutinik immikkoortunik 16-inik imaqarpoq, maanna nunarput tamakkerlugu sulissutigalugit aallartinneqareersunik. Taanna ataasiinnarmik siunertaqarpoq: Qularnaassallugu sulisussat najugaqavissut suliffissarsisarnissaat, nunatsinni sumiluunniit, aammalu annertuunik suliniuteqalissasugut siunissami sulisussat suliffissanut suliffeqarnermi neqeroortugineqartunut tulluarsarneqarlutik piareersimasarnissaannut. Taamaattumik Suliffissaqartitsinermi periusissiaq atorneqarluar-

sinnaavoq najugaqavissunik sulisoqarnerup annertunerulersinniarnanuk periusissiamik suliaqarnermi.

Tamatamani piumasaqaataavoq inuusuttatta pitsaanerusumik atuartinneqarnissaat, amerlanerusullu inuusuttunut ilinniagassani aamma inuussutissarsiutinut ilinniagassani aallartsittarnissaat, amerlanerusut ingerlaqqiffiusumik ilinniakkamik toqqaasalernissaat, aammalu inersimasut ilinniaqqinnissamik immikkullu ilinniagaqarnissamik neqeroorfigineqartalernissaat, toqqaannartumik suliffeqarnermi atorneqarsinnaasunik. Tamakkua tamamik siorna aallartinneqarput. Suliniutit aallartinneqartut allarpasuit ilutigisaannik, kommunini oqartussaasunik aamma Majoriamik nukittorsaasussat, nunatsinni sumiiffinni tamani qasusuillutik sulisuusut sulianik annertuunik ingerlatsineranni.

Naalakkersuisut Suliffissaqartitsinermi periusissiaq "Suliffeqarneq toqqissisimanartoq" aqqutigalugu suliniutit arlallit najugaqavissunik sulisoqarnerup qularnaarneqarnissaanik siunertaqartut aallarereermatigit, Naalakkersuisut inassutigissavaat aalajangiiffigisassatut siunnersuutip itigartinneqarnissaa.